

La mendranzes domana sostegn

L'Assessor regionèl Florian Mussner à tout dant i raprezentanc di ladins, mochegn e cimbres



L'assessor Mussner e l conseier Chiocchetti con l funzionarie Gamper tel cors de la scontrèda.

Mendranzes - Partegnir a na mendranza linguistica cogn vegnir conscidrà n valor enjontà e de chest esser stolc e enformé. L'afermazion de chest prinzip l'é l'pegn maor che à tedant aldidanché la mendranzes linguistiches regionèles. Chesta conscidrazion é vegnuda fora tel cors de na scontrèda stata enstadi a Trent anter l'assessor regionèl per la mendranzes linguistiches Florian Mussner e i raprezentanc di comuns e di istituc culturai di Mochegn, di Cimbres e di Ladins, la mendranzes linguistiches del Trentin. A chesta scontrèda à tout pèrt ence l'conseier regionèl ladin Luigi Chiocchetti che a mesa legislatura l'tolarà l'post de Mussner per corir l'encèria de assessor regionèl, ge jan dò a la

logica de stafeta.

Na scontrèda voluda da l'assessor per poder descorer de la politiches regionèles de defendura de la mendranzes e per meter jù, ensema ai enteressé, la scomenzadives de la Region, che te chest setor la met ogne an presciapèch 2.150.000 Euro. L'assessor Mussner à sotlineà l'empor-

tanza de fèr crescer anter la comunanzes de mendranza la coscienza de partegnuda, e l'besegn de investir soraldut per slarièr fora l'lengaz anter i joegn che rapresenta l'davegnir de ogne mendranza.

L'assessor Mussner à sotlineà ence l'besegn de no lascèr da na pèrt l'svilup economich e sozièl di teritories olache vif la mendranzes, che per conservèr sia reijes culturèles à de besegn ence de crescer e de se svilupèr economicamenter. Da chest pont de veduda Mussner se à dit spervajo che cogne vegnir didà de più la mendranzes de lengaz todesch tel Trentin, che à de besegn de maor sostegn, per via ence che sie recognosciment é vegnù più tèrt.

L'conseier Luigi Chiocchetti à uzà fora l'besegn de meter ensema de più la forzes, coordenan al miec l'atività te chest ciamp de la Region e de la Provinzies autonomes, con chela de no sfrelaussèr la ressorses.

Da man di raprezentanc de la mendranzes linguistiches trentines l'é stat palesà n fort reingraziament per l'atività portèda dant da la Region, che é stata defenida desche "la cèsa de duta la mendranzes" del tegnir regionèl. Anter la domanes portèdes dant, apede a chela de investir più che l'é meso su la formazion e su la istituzions scolastiches, ence l'met de ruèr a na semplificazion de la burocrazia per poder apede ai contribuc publics. Sun chest pont l'Assessor Mussner se à empegnà a verificchèr coluna soluzions che fossa possibol, e l se à dit d'acort sul fat che certa outes la burocrazia destramet chi che vel se dèr jù te scomenzadives a carater culturèl.

L'é vegnù fora ence l'besegn de n maor empegn te l'enjignèr ressorsa umanes tel ciamp de la comunicazion. Tinùltima l'assessor regionèl à metù al luster che aldidanché l'é duc i strumenc, normative e finanzières, percheche la mendranzes posse crescer amò de più, ma la mendranzes medemes cogn se dèr jù percheche chest sie possibol.